

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN SYED IBRAHIM BIN SYED NOH

KAWASAN : [LEDANG]

TARIKH : 4 JULAI 2019 (KHAMIS)

SOALAN NO. 11

minta **PERDANA MENTERI** menyatakan apakah peranan Majlis Konsultasi Perpaduan Negara untuk meningkatkan perpaduan di kalangan rakyat Malaysia dan bagaimanakah Majlis Konsultasi Perpaduan Negara berjaya mengurangkan isu-isu perkauman dan agama.

JAWAPAN

Yang di-Pertua,

Sejarah membuktikan bahawa Malaysia dapat mengatasi sebarang cabaran jika rakyatnya bersatu padu dan sanggup melalui kesukaran bersama. Malah, kepelbagaian rakyat Malaysia adalah kekuatan kita. Ia tidak sepatutnya menjadi punca konflik, tetapi perlu menjadi resipi untuk mencapai kejayaan dalam pembangunan dan kemajuan sosio-ekonomi.

Perpaduan nasional bukanlah satu anugerah semata-mata, malah ia harus dibina, diurus dan diselenggara dengan baik agar kestabilan dan keharmonian negara dapat dikekalkan. Ikhtibarnya, kita semua perlu berganding bahu dan bersatu tenaga bersama-sama kerajaan mengambil langkah-langkah yang positif dan membina bagi memastikan perpaduan dan keharmonian di negara ini akan terus kekal dan terpelihara.

Majlis Konsultasi Perpaduan Negara telah ditubuhkan pada bulan September 2013 sebagai usaha Kerajaan ke arah penyatuan nasional (*national reconcilliation*) bagi mengurangkan polarisasi kaum dan membina bangsa Malaysia yang bersatu padu. Penubuhannya menjadi platform untuk membincangkan isu-isu sukar dan kompleks dalam kalangan masyarakat Malaysia serta merintis jalan penyelesaian ke arah merapatkan jurang yang menghalang perpaduan. MKPN telah ditunjangi oleh Ahli-Ahli Majlis yang mempunyai kredibiliti, bersifat terbuka, neutral dan mempunyai pandangan konstruktif berhubung dengan hal-ehwal perpaduan.

Pelantikan Ahli-Ahli MKPN bagi sesi pertama adalah pada 25 November 2013 dan telah tamat tempohnya pada 21 Oktober 2015. Kejayaan utama MKPN adalah penghasilan satu *Blueprint* iaitu Pelan Perpaduan, Kesepaduan dan Penyatupaduan Malaysia (PPKPM) yang telah dipersetujui di dalam Mesyuarat Jemaah Menteri pada 12 Ogos 2015. *Blueprint* PPKPM telah dirangka berdasarkan input dan maklum balas yang telah diterima melalui 18 Dialog Rakyat yang telah diadakan di seluruh negara dan melibatkan penyertaan seramai 5,530 orang mewakili pelbagai pihak berkepentingan dan sektor masyarakat.

Selaras dengan Janji 56 dalam manifesto kerajaan yang menekankan bahawa perpaduan nasional tetap dan sentiasa menjadi agenda utama kerajaan, Jabatan Perpaduan Negara dan Integrasi Nasional (PERPADUAN) telah mengambil langkah menjenamakan semula Majlis Konsultasi Perpaduan Negara (MKPN) kepada Majlis Perundingan Keharmonian Rakyat (MPKR) dan telah diluluskan oleh Kabinet pada 12 Jun 2019. MPKR sebagai kesinambungan kepada MKPN akan meneruskan usaha-usaha memelihara dan meningkatkan perpaduan nasional di samping akan mempromosikan Malaysia di peringkat global sebagai model negara moderat yang berjaya menjaga keharmonian antara kaum dan agama dan berfungsi sebagai platform untuk percambahan fikiran dan rekonsiliasi antara kaum dan agama sebagai usaha ke arah penyatuan nasional (*national reconcilliation*).

Tambahan pula, MPKR juga akan bertanggungjawab untuk memantau dan memastikan perancangan inisiatif dan strategi di bawah Pelan Tindakan Perpaduan Negara (PTPN) yang inklusif dan merentasi semua Kementerian dan Agensi Kerajaan dapat direalisasikan apabila pelan ini diluluskan oleh Kabinet kelak melalui pelaksanaan program-program yang spesifik dan konkrit untuk menyemarakkan perpaduan, kesepaduan dan penyatupaduan rakyat Malaysia. Manakala, pemilihan ahli-ahli yang akan menganggotai MPKR adalah dalam kalangan individu yang berpengalaman serta komited terhadap perpaduan negara dan kesejahteraan sosial rakyat, mempunyai kredibiliti, bersifat inklusif, terbuka, neutral dan mempunyai pandangan konstruktif serta mewakili semua lapisan masyarakat.

Penjenamaan semula MKPN kepada MPKR merupakan suatu langkah terbaik Kerajaan kerana ia mampu menjadi tulang belakang Kerajaan dalam hal ehwal perpaduan dan kesejahteraan sosial. Sebagai sebuah badan bebas, MPKR akan bergerak membawa misi perpaduan di bawah pucuk pimpinan kerajaan semasa untuk rakyat dan negara Malaysia.

Sekian, terima kasih.

Disediakan oleh : Bahagian Dasar dan Perancangan

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN HAJI AWANG BIN HASHIM [PENDANG]

TARIKH : 4 JULAI 2019 (KHAMIS)

SOALAN NO. 12

Minta **MENTERI HAL EHWAL EKONOMI** menyatakan pemilikan Bumiputera dalam aset bukan kewangan seperti hartanah komersial, industri dan kediaman di lokasi utama dan strategik.

JAWAPAN

Tuan Yang di-Pertua,

1. Untuk makluman Ahli Yang Berhormat, pemilikan Bumiputera dalam aset bukan kewangan seperti harta tanah boleh digambarkan berdasarkan transaksi harta tanah dalam pasaran primer dan sekunder. Data berkaitan ini dikeluarkan oleh Pusat Maklumat Harta Tanah Negara (NAPIC) di bawah Kementerian Kewangan pada setiap tahun.

2. Pada tahun 2018, peratusan dan nilai transaksi harta tanah kediaman, komersial dan industri melibatkan Bumiputera dalam pasaran primer adalah seperti berikut:

- i. transaksi harta tanah kediaman adalah sebanyak 46.5 peratus iaitu bersamaan RM6.2 bilion;
- ii. transaksi harta tanah komersial adalah sebanyak 8.2 peratus iaitu bersamaan RM160 juta; dan

- iii. transaksi harta tanah industri adalah sebanyak 1.2 peratus iaitu bersamaan RM8.43 juta.
3. Manakala, bagi pasaran sekunder, peratusan dan nilai transaksi harta tanah kediaman, komersial dan industri melibatkan Bumiputera adalah seperti berikut:
- i. transaksi harta tanah kediaman adalah sebanyak 30.41 peratus iaitu bersamaan RM16.85 bilion;
 - ii. transaksi harta tanah komersial adalah sebanyak 3.84 peratus iaitu bersamaan RM1.06 bilion; dan
 - iii. transaksi harta tanah industri adalah sebanyak 0.67 peratus iaitu bersamaan RM100 juta.

Sekian, terima kasih.